

平
播
全
書

平播全書卷八

明長垣李化

牌票

行總兵萬鏊移駐重慶

爲督撫地方事本月十二日據兵巡上川東道三詳報准
遊擊房嘉寵移稱播酋楊應龍公然狂逞親統大兵擾我
綦江又以偏師分犯南川劫擄居民等因又據按察司報
據重慶府綦江縣申稱楊應龍親自統兵數萬在於苗兒
岡趕水劄營要與房遊擊講話等因詳到本部院爲照楊
應龍親統大兵擾犯內地連據急報殊爲可恨當今國家

全盛之時豈容小醜縱橫若此所據總兵大將有鎮守全
蜀之責合行防禦爲此牌仰總兵萬鏊文到卽便統領慣
戰家丁移駐重慶一帶併川南地方督併原有官兵加謹
防守度其事勢緩急相機而行應調軍兵一面徑自調取
合用糧餉一面計算的確移文布政司通詳動支本官到
彼務須振揚威武設策隄防以保萬全毋得輕率寡謀爲
敵所誘致損軍威亦毋得晏然無備任其剽掠致傷民命
此在本官審時相機施行毋得遲違未便

行貴州司道防酋

爲督撫地方事本年六月十四日據防播遊擊房嘉寵報

稱播酋楊應龍近日公然親統大兵入犯綦南該職拏獲
苗夷袁志剛郭林二名吐稱楊應龍於前月十七日點兵
六萬令伊子楊朝棟分兵二萬要往貴州又分三路由松
坎眞州等處入犯綦江南川勢必死戰等因到本部院爲
照播酋楊應龍集兵四出復要擾犯內地明是窺我虛實
故爾挑釁作歹今據報酋已兵窺黔省未審果否入犯應
合行查爲此除牌行總兵官童元鎮外牌仰該司官吏卽
查播酋五六月內曾否兵犯該省有無殺擄搶掠據實查
明回報如果該酋今尙屯兵彼中作何設法解散毋令軍
兵聽其誘敵致損軍威亦毋晏然無備縱其擄掠致傷民

命仍轉行思石等道及總兵官與參遊守備等官各將所轄信地督率原有防禦軍兵晝夜加謹隄備毋容時刻懈弛儻有緊急情形馬上差人馳報毋得遲違未便

調天全兵

爲督撫地方事據布按二司會議呈奉本部院批據總兵官萬鏊奉調防播乞要請調松潘陝兵三百三十六名雅黎遊擊吳文傑部兵三百名天全土兵一千名邛州嘉定民兵各一百名召募都蠻弄兵三千名皆當依擬調取隨營分布等因到本部院除各處前兵另行外所據天全土兵合行調發爲此除差官齎捧令旗令牌前去天全徵發

外牌仰建昌道官吏卽行天全正副土官將部下土兵挑選一可當十有馬慣戰精兵一千名該道查驗堪用卽行點發就令該管掌印土官統領刻期徑赴重慶聽該道同萬總兵分布防守其行糧該道照依舊規每兵一名日支銀一分五釐馬一匹日支草料銀一分以彼處起程日期爲始到彼支月糧住止計程照日臨期扣算合於邛州庫貯銀內動支差官解交統兵官給散如由水路應用船隻該道卽行備設各兵務要恪遵紀律經過處所不許擾害居民如違照軍令處治仍具官兵姓名文冊并起程日期報查毋遲未便

約束官兵

爲軍務事照得播酋公然親統多兵要犯內地應徵調官兵前至重綦一帶防禦誠恐經過騷擾地方合行示諭爲此示仰領兵各官務要嚴束各兵恪遵紀律行則魚貫止則林立凡經過地方必須秋毫無犯待事完之日從優犒賞敢有故違軍令生事擾害居民者許被害人稟告管押官於旗牌下按法施行如各官縱容不治許赴州縣告申本部院行拏以軍法從事決不輕饒特示

一軍兵強宿姦淫婦女者斬

一軍兵擅取民間一草一粟一雞一菜者斬

一兵行離亂部位者斬

一住劄經行燒毀人房屋者斬

一強買物件恃眾打人生事騷擾者俱網打一百

防酋報復

爲督撫地方事本月十七日據遊擊房嘉寵報稱播酋父子劄兵於母渡三溪劫掠鄉民職同張良賢率兵堵截回營有伏兵撞遇播賊百餘一處對敵斬獲苗級三十名賴生擒五名等因到本部院除功級查明另行給賞外看得狡酋爲計甚詭今我兵雖獲前級彼必含嗔抱忿抑或陽爲失利使我輕敵深入中彼奸謀黔省躁進可爲殷鑒又

恐彼乘我之虛長驅入犯合就嚴行隄備爲此牌仰

兵巡總

上川東道官吏

萬 卽便轉行該邊綦南一帶將領軍兵黨甲

鄉勇晝宵併力隄防把截不許時刻疏虞毋因小勝驕志
爲敵所誘致損軍威亦無坐視侵犯致貽民害惟在相機
動止來則儘力撲滅去毋深入窮追如或故違三尺具在
先將申飭過遵守隄防緣由飛報查考毋違

議官造軍器

爲督撫地方事照得播酋楊應龍邇來親統大兵擾犯內
地勢甚猖狂應合防禦所有軍前急需軍器火器先據萬
總兵詳報各數前來已批該司去後但查應造不止所開

之數如槍刀火器別名甚夥應委廉幹職官同前…併刻
期製造合行查議爲此除已調取守備劉天俸前來會同
製造火器又行成都府屬併五衛揀取匠役外牌仰布政
司官吏卽會巡西道於成都等府佐貳中議委能幹一員
會同劉天俸專製軍前一應軍火器具仍備查應用某項
器械可爲實用某項火器堪以禦敵各該若干大約用銀
若干於何項動支專付何官置簿收支發買何項材料計
期幾旬可以竣事或計幾日一送本部院閱驗一送該司
道稽覈務必堅利迅速堪以禦敵逐議通詳具報以憑施
行此係緊急待用毋得遲違未便

設保甲

爲督撫地方事照得播酋楊應龍邇來猖狂大異往昔旣親統多兵入犯綦江擾害居民又差遣夷目屯割合地講要撤兵明在窺我虛實挑誘劫害應合隄防以保萬全但東南兩地鄰播州縣歧路頗多難以寸地設兵所有保甲自衛之法卽平時無事尤須注意力行矧今師旅煩興之際豈宜晏然自若亟應舉行爲此牌仰兵巡_上東道官吏卽行鄰播一帶州縣掌印巡捕官各將境內原有保甲每十戶編爲一甲置一大牌上書總督部院明文下列人戶姓名家口若干何項生理又約幾甲編爲一黨亦設一牌

總開姓名各令備製弓矢槍刀器械在城每鋪在鄉野每村每堡各設一黨備大鑼一面立有力量者充爲黨正甲長若遇苜苗出沒或盜賊生發急爲鳴鑼齊聲相應與同官兵併力撲驅獲有苗級報官一體給賞毋得聽其訐誘深追致失事機亦無怯懦逗遛觀望尤不許無故深入播境生事啟釁罪各有歸捕盜官仍不時親詣鄉村查點各具編立過黨名各總計人戶若干數目先用花名文冊徑報本部院查考以甄印捕官風力若掌印官虛應故事不行編置止同空文巡捕官或因而生事害人輕行騷擾定行拏問俱毋遲違未便

預行整備精兵聽調

爲督撫地方事照得播州土酋楊應龍近來狂悖異常侵犯日熾親統大兵屯劄綦江母渡三溪擾害居民又遣頭目趙總營集兵於合江磨刀溪講要拆堡陰遣生苗恣行搶掠合當進剿查得該道所屬素有慣戰士漢雄兵合先預備聽用候差官令到或另文至日卽發爲此牌仰該道官吏卽將後開土漢兵數責令各土官逐一揀選年力技藝精強衣甲器械堅利一可當十堪以衝鋒破敵者籍名在官著實操練停當檄文一至土官親自統領管押卽日起程至重慶一帶聽令分布毋容以老弱不堪者充數糜

飭查山罪之仍取各土官遵依不違并有無足數甘結該
道具由黏繳查考此係文到卽行刻期卽至事理嚴令各
兵各備腦包絮被鋒利器械束裝以待行糧聽給毋得遲
違未便

計開預整聽文應調兵

一調建武高琪等縣召募慣戰都蠻弄兵三千名

一調宜賓縣石國兵四百名

一調馬湖蠻夷長官司土兵一千名

一調敘州馬湖降夷五百名

一調黃郎馬氏土兵一千名

一調永甯土婦下土兵五千名又添二千名共七千名

右行敘馬瀘兵備道

一調永甯衛左後二所桿子手三百名

一調鎮雄府土兵一千名

一調烏撒軍民府土兵一千名

一調烏蒙軍民府土兵一千名

右行巡下南道

一調建昌各衛應召募兵五百名

右行建昌道

一調茂州土兵五百名

右行威茂道

一調資陽縣勇兵五百名

一調資縣勇兵五百名

右行巡西道

一調安縣石泉壩底鄉勇并龍安土軍五百名又添五百名共一千名

右行安縣道

一調東鄉開縣弩手各三百名

一調萬縣兵一千名

一調雲陽縣南岸土兵五百名

一調奉節縣南岸土兵五百名

一調建始縣土兵五百名

右行巡下東道

一調酉陽宣撫司土兵一萬名

一調平茶長官司土兵三千名

一調邑梅長官司土兵一千名

一調石碓宣撫司土兵五百名

一調石碓司土同知土兵五百名

右行巡上東道 共調兵三萬名零

諭旨

爲督撫地方事照得楊應龍向雖有進剿之旨然部議猶令兩省巡按會勘此其人尙在生死之間若其悔罪乞哀尙有可生之路今不知何故統領多兵突犯內地意欲何爲豈不知四海九州比之一播孰大應龍之勢比之劉東陽平秀吉孰強豈天奪之魄自取滅亡令傍觀者欲救之不得耶今幸兵未深入若其速行斂退歸巢猶可圖全若更猖狂不已則雖欲保全之不可得矣合先曉諭爲此牌仰巡上東道卽便差官速行曉諭以後彼有差人無得殺害兩國交兵不拒來使况彼原係土司乎聞彼以地界防

兵爲詞此只宜具文申請何事張皇乃爾自速天誅也該道併諭之差過官役諭過情由一面回報毋遲

行湖省防酋

爲督撫地方事節據防播參遊等官報稱拏獲播苗吐稱楊酋近日集兵六萬一犯川中一犯楚黔等因到本部院看得湖省衛所逼近播地歧路甚多曩者該酋遣目統兵入犯如履荒徑且債弁開門延寇大損國威今酋復滋狂逞防禦宜厚目前該省有無動靜情形防守將領未見一字申報深屬可虞應合行查爲此牌仰湖廣布政司官吏卽便移文彼中該道并將領衛所等官速查楊酋時下有

無入犯地方有無失事防禦官兵有無足恃應否增添與夫設險扼隘等項事宜應調停者陸續詳報毋容坐視致失事機儻彼中有大小緩急兵形卽刻馬上差人飛報仍行令各將領衛所等官每半月一次將各管地方有無甯謐結由馬上遞報如有違慢定以匿情拏解軍法治罪不貸該司先將行過緣由報查

查鄰播府州縣防禦事宜

爲督撫地方事照得播酋楊應龍旣稱添兵攻城防守最宜慎密但綦江孤處雖有多兵固守尙爲可虞鄰近城池俱宜戒嚴應合行查爲此牌仰分巡上川東道官吏卽查

近播府州縣要見某城卽今防守兵有若干係某將統領
守城民夫若干可否堪用城外會否設有險塹城上火器
火藥弓矢槍刀有無足用城內糧餉可食幾時不足之數
曾否收買逆酋如此大選各城作何防守作何偵探作何
應援與一切固守事宜行令各該掌印正官會同將領一
一查明登答該道款類一詳三日內具報仍一面責令各
印捕官將城外壕塹務必深淘寬闊城上多備磚石銃彈
之類該道選委的當官員將應備者嚴行料理毋得遲違
未便

買餉

爲督撫地方事照得防播官兵雲集應備糧餉必須充盈除已行該司先後動銀五萬發巡上東買米外恐彼處地方多事之際收買難繼合再買運爲此除會按院外牌仰四川布政司官吏卽查西北濱江一帶舟運方便或離大江不遠府州縣某處可買米若干應用銀若干或於司庫動發或各州縣庫貯可充軍餉銀內徑支趁今時下秋熟羅買并再查各見貯在倉備賑穀各有若干作何碾米可計若干如何設法製過絕其腐蛀霉氣或用篾篥縛盛陸續運至某處如何堆積應委何官前去董理仍將各處應預備賑倉穀作何買還以充其數此係兵集糧隨立待事

理叮囑各守令注意力辦完數徑報本部院查考該司作速先詳具報毋遲

檄萬總兵

爲督撫地方事本部院細詳楊酋情狀酋所最恨者惟參將房嘉寵所最憚者亦惟房嘉寵則所致死力攻者必在綦江無疑若綦江有失人心已搖將來事勢大有可慮今照總兵任專大帥奉有專敕保守城池乃第一義應專力決策嚴督兵將固守綦江速移該道多運稻米以資食費多設壕塹以阻進攻本官宜移駐近便地方遙爲聲援通令各將領一體遵照本部院賞罰惟以城池之存亡論各

城均屬要地獨綦尤急軍法具在各宜慎思

行上東下南敘瀘三道防守

爲軍務事據遊擊房嘉寵報稱楊酋督兵逼近綦江縣僅離五里酋必猖獗等因到本部院所有四面鄰封州縣城池地方俱在喫緊應令嚴行防守爲此牌仰該道卽便轉行合江瀘州江安江津南川武彭涪豐忠州長壽等州縣掌印官嚴督應捕員役卽便團練保甲修理事器械城池損壞者亟爲補修糧餉缺乏者速爲收買遠鄉人戶各爲設險近城人戶行令歸城如遇苗人滋蔓小則併力勦殺大則嬰城固守城門早閉晏開遇夜令人巡警掌印官不時

親查以戒不虞毋得因循虛應故事如有疏虞軍法具在

再諭楊酋

爲督撫地方事照得楊應龍雖有近旨行勦然部議猶令兩省巡按行勘是朝廷尙未盡絕之也轉禍爲福正在此時本部院入境意其必囚首乞哀自求生路不知是何項姦人誘引令其無故興兵隨處屯劄甘心必犯內地豈其陰譴已重令必欲併一線之路塞之而彼不自知耶卽應調兵行勦但恐朝廷德意彼或未知業經曉諭去後未據回報今幸兵未深入如盡撤回巢尙得瓦全若復狂逞恐將來百口無能自文合再曉諭爲此牌仰分巡上川東道

卽便差官速行曉諭儻彼有不白之冤許令速行申辯毋再輕弄干戈自取天誅該道速諭之差官諭過情由先行回報毋遲未便

防禦渝城

爲督撫地方事照得播酋勢甚猖狂已殘內地城池防禦時不可疏該府城池雖稱天險查閱形勢西南通遠南紀等門甚爲卑矮且路達省會亟應設險隄備查得昔年蔡伯貫爲亂各士夫舉監生員吏承有力之家俱照地界責成垛口晝夜防守今恐人心不一法令不行彼此因循致誤軍機合發令旗庶儆愚頑爲此除差人齎執前來外牌

仰巡上東道官吏卽將府城守堞之人不拘士宦生員吏承及有力之家各出壯丁備鋒利器械弓弩磚石日夜在於城上堞口加緊隄防掌印巡捕官時刻查點仍將重慶衛見任指揮千百戶各編定一信地隄備如遇差占必撥頂補至於通遠一帶緊地多用武官軍兵嚴加守禦通將一切城守事宜畫圖黏貼責成員役人戶姓名報查如有誤事避難及臨事不用命者該道卽以軍法從事其江津南川悉照此作速移文舉行毋忽

行巡下南敘瀘兩道移駐

爲緊急夷情事照得播酋深入內地攻劫搶掠已爲極慘

合江一路乃酋平日屢犯目今擁眾大逞該縣尤爲喫緊

雖有官兵防守必資該道與兵巡道督率庶保無虞令行責

成爲此除會按院外牌仰巡下南道官吏卽便移駐相應

地方會議設策務將此路保守無虞該道係專敕地方本

部院已於六月十七等日不次申嚴防守至再至三矣慎

勿避難觀望虛文同塞明例昭然誰其寬假仍將移駐地

方并日期飛報查考以後仍將彼中情形一日一報勿忽

勿緩

行各分巡道募兵防守城池

爲緊急軍情事據巡上東道報稱楊酋糾結苗兵深入內

地攻劫搶掠勢甚披猖等因到本部院恐此酋率苗滋蔓別處爲害不小亟應募兵防守爲此牌仰該道官吏即便火速行令各州縣將城垣矮薄處所上緊星夜修理高固以防突攻仍動支庫銀隨其多寡各募本處精壯勇兵協同原編操兵并居住人民無論士夫均派協力萬分加謹晝夜防守城池地方其各鄉人戶俱令設險近城人戶盡收入城仍查有踪跡可疑之人俱驅逐遠去不許容留其應用錢糧聽一面先動支用不必候呈允耽時誤事其省城起至重慶一路州縣召兵防守尤爲要緊不許延遲一刻如視常怠緩者軍法具在定不輕貸各屬將募兵姓名

并修守城池緣由具報以憑查考

行道募勇兵

爲督撫地方事近報播酋楊應龍統兵入犯內地聲勢甚大所有鎮城應集勁兵團練以備緩急爲此除會按院外牌仰該道官吏卽行後開州縣照數召募精兵令各備器械一面在該州縣操練聽候另文取赴本部院驗發領兵官團練施行其行糧等項就於該州縣庫貯堪動銀內照例支給此係立等事理毋得視爲泛常如違官吏提究不貸

川西道屬

崇慶州三百名 溫江縣二百名 仁壽縣二百名
井研縣一百名 邛 縣二百名 崇甯縣一百名
灌 縣二百名 新繁縣一百名 什邡縣一百名
縣竹縣一百名 漢 州三百名 金堂縣一百名
雙流縣一百名 新都縣二百名 安 縣二百名
德陽縣一百名 羅江縣一百名 新津縣二百名
彭 縣一百名 以上共三千名

柄牌三諭楊酋

爲督撫地方事本月二十九日據兵巡上東道呈詳備抄
楊應龍申文內稱被房參將張遊擊無故加兵殺擄又隱

七姓讎奴殺絕投文人役又將差奏目把許文志等屠殺
不得已親自會話二官不分皁白出兵交戰并獲何邦卿
等聳惑揭帖乞賜備達等因轉報本部院批播州係累朝
爵土楊應龍亦素有功勞朝廷安忍一旦廢之以貴州報
伊戕殺官兵不言勦則無以示四夷耳觀部覆猶欲兩省
按院行勘此其爲伊留意尙有餘恩伊乃公然狂逞何也
意欲示武於人不免增罪於已誰爲應龍畫此計者愚亦
甚矣今日之事旣云激於控訴無門若斂眾歸巢靜聽處
分尙可自解仰該道速宣諭之何邦卿等以何事潛匿曾
經何衙門問斷伊男身屍見在何所查明另報卽日批道

轉諭去後誠恐傳宣不到又恐應龍愚昧聽奸唆撥不知部科觀首順逆兩途以定斷案德意合再傳諭爲此牌仰巡上東道官吏即便差人速諭應龍禍福兩端孰爲輕重俛思朝廷三尺不可屢干卽令各目收同夷苗各歸巢穴專聽兩省按院查勘完日會題定奪如或痴迷貽禍不淺宜亟思之母徒晚悔若果有難白急冤許據實徑申兩院處分該道仍將本部院今批情節一一回報施行

調取西南倉穀

爲督撫地方事據巡上東道稟稱播事孔亟請將川西川南沿江一帶有穀者行令用船順流至重慶接濟俟事完

補還等因到部院看得重慶防兵應用糧餉所需甚迫各倉見貯穀石應合借運爲此票仰四川布政司官吏卽行巡西巡上南二道內所屬州縣倉儲穀每處若干該司查照循環酌量定數行令文到日差人用船裝送重慶收貯軍中應用各將起解數目日時馳報如有遲違掌印官叅治承行吏書革役究罪施行

催買馬

爲軍務事照得應買戰馬先據該司議價通詳分行各州縣收買及稱各馬到營之日每馬每日給銀二分作草料工食等因具報部院已經久行作速完報去後止據雙流

等縣申報買完其餘並無音耗事關軍機合行查催爲此
票仰四川布政司官吏卽便查照原詳議定事理將各州
縣承買馬匹剋期如數買完解驗以便起發軍前應用毋
得再遲未便

諭民收稻不必逃避

爲督撫地方事近聞川東一帶民人因播苗入犯率多委
棄已熟稻田不肯收斂只行逃避恐播苗未必至而居民
生計先失爲此牌仰巡上東道官吏卽便出示曉諭鄰播
一帶州縣軍民人等各將田禾收拾仍聽該道及所司差
人偵探果有警息暫入城中不許張皇拋失家業致誤生

理未便

行守巡道募兵查奸細

爲督撫地方事先該本部院牌行各守巡兵備道轉行各屬州縣召募精兵赴各該衙門防守去後爲照聽募兵士多係無籍之徒如東南近播一帶又有土民素與播酋交好乘此募兵攬入其中透漏消息應合嚴行查覈爲此牌仰四川布政司官吏卽便移行各守巡兵備道將原行召募兵役務要嚴加揀選取具黨甲鄰佑結狀果係民家原與土夷素無交結者方許收充各有司印捕官亦須廉訪毋得誤收應役自取愆尤未便

責成道鎮守南川江津

爲緊急軍務事近據巡上東道并萬總兵各稟稱南川士
民聞播酋聲息或云縣民十去八九所存者惟縣中阜快
或云士民空城逃去無一存者俯賜速催兵將前來等因
到本部院查得六月十三日據萬總兵詳請龍安參將柴
尙仁并原任都司范希正守備陳嗣昌張本在范張陳本
部給與應付隨本官赴重慶與參將柴尙仁遊擊吳文傑
通已催取其漢土軍兵本部院無日不遣差官兵分投四
出徑至各土司催調計此時到彼已多今南川江津旣云
警報應將先到者卽發去救援防禦應合再行爲此牌仰

巡上東道官吏總兵萬鏊卽便速將先到土兵分投馳至南川江津等處防禦仍查五將官因何遲延不到有無避難情弊一面速令何將守南川何將守江津瀘州等處用何處兵星馳發去其附近川東土司與該道所屬土司一日一次差人前去守催至於一應隄防府城尤爲緊要及鄰播一帶事宜查照節次牌內事理參酌隨宜處置施行毋得遲違未便

行巡下南道隄備

爲緊急軍務事據遊擊楊敏政并合江縣申報播兵於七月初二日三更時分兵三路攻圍五畝堡領兵指揮王繼

祖退出小寨堡勢甚迫切等因到本部院爲照合江防播
近奉聖旨專責巡下南道料理本部院調發馬湖宜賓等
兵三千守瀘州又調永甯土兵七千五百守合江土司乃
該道所轄未見催發到彼各兵行糧節經允行動給亦未
見呈報支領今合江日日報警未見該道具報不知應援
各兵曾否調到應合行查爲此牌仰敘瀘道官吏即便督
行楊敏政及領兵官軍將地方居民城池萬分加意防守
前項已調各兵再差人守催星馳前去策應客兵行糧募
兵工食卽日照例於抽兵工食內支倘不足於合江縣解
司錢糧內支給完日造冊呈報毋得疏忽致誤軍機今本

部院又發參將王夢吉帶兵五百名又鎮遠營軍五百名前來防守合江又周大謨帶兵五百名赴瀘州防守先該敘瀘道呈詳至今曾否到州上緊催赴其應就便調發援兵聽該道隨宜遣發一面申報其瀘州素號富饒酋久垂涎該道駐劄在彼尤當加意防守無致疏虞未便

行合江防守

爲軍務事據合江縣申報楊酋發兵入犯五畝堡等因緣由到部院爲照該縣防守除見在將兵外又調建武標兵六百名永甯土兵七千五百名一日一次差人守催去後計日可抵該縣惟是本官協同楊敏政獎率軍兵及原設

鄉兵殺手併力隄防爲此牌仰本官卽便會同遊擊楊敏政督同見在官兵晝夜偵探把截堅守城池各堡居民責令搬入城中毋得張皇失措急速差人守催建武永甯各兵星飛到合併力堵截各兵行糧就於該縣徵解司糧銀內照數支給一面具報該縣同楊敏政出示曉諭居民共守城垣毋得遠逃失所未便

調王夢吉
鎮遠營兵救合江

爲緊急軍務事七月初七日據合江縣申報播酋楊應龍集領苗夷要犯合江十分緊急等因到本部院看得所報事勢緊迫應合發兵防禦爲此牌仰參將王夢吉卽將隨

帶赴省勇兵照依報到實數卽日親統星馳前到合江城
防守毋得遲延頃刻其行糧聽布政司支給若本官兵到
合江宜堅守城池毋得爲敵所誘相機防禦施行毋違

查議湖貴兩省備禦事宜

爲緊急軍務事近據兵巡上川東道并總兵官萬鏊節報
播酋楊應龍親統多苗攻陷綦江縣治今又聲言要犯重
慶又欲偏師入犯湖廣貴州地方等因到本部院爲照該
酋詭詐百端爲謀甚秘案查業於六月十五日牌行該司
將鄰播一帶比常加謹隄備併查地方曾否兵犯有無殺
擄搶掠又一次行司催查并議應否增添兵將防禦與設

險把隘每半月將緩急情形馬上飛報又一次會令守巡各道將所屬土司下土兵某處可調若干作何挑選調發作何責成戰守又一次移咨撫院行司專官製造軍火器具集兵整餉又一次令將該司與合屬倉庫錢糧備查堪濟軍興實數俱當通詳去後迄今未見具報曾否遵行卽今酋勢甚迫事同燃眉本部院遙在川省聲聞甚遠所有該省比鄰播酋專司信地官兵無憑稽考合應查明庶便責成爲此牌仰布政司官吏卽會按都二司并鄰播各道要見某州縣衛所最爲要緊某處次之緊隘者卽今見屯兵馬若干應否增添係何將領在彼駐劄屬之何道專管

兼管若酋復蹈舊轍突然入犯當在何處預集軍兵得免貽患逐一備細造冊詳報仍將節次行查與諸凡細微開載未盡事宜及首先集調土兵召募勁兵應動糧餉并趁時熟預積儲糧與具報緩急兵形照依原行逐起通詳以憑施行今寇入門庭勢同呼吸該司與各司道注意將應調兵馬應積糧餉上緊整辦以便防禦此係萬分緊急軍情毋再遲違未便

行貴州貴甯各道防守興隆等處

爲緊急軍務事照得防播事宜節經牌行

湖廣貴州

布政司移

行

湖北貴甯等道查議防守將兵糧餉把截通播緩急隘徑與

夫製器具偵情形等項去後不次行催未據呈報今本部
院查得興隆清平平越新添龍里五衛及黃平所龍泉司
土溪清浪鎮遠偏橋等衛俱切近播州地方亟宜添設將
兵防守以保無虞爲此牌仰該道官吏卽查該省有何項
緩地軍兵可以抽調或新招募將前項近播衛所土司每
城設兵三千遴選謀勇將官一員統率防守緊隘如無原
設將官或量以閑將委用一遇有警併力堵截平時不宜
輕動生費其各官兵糧餉於何項銀內動支儻有不及作
何區處至於鄰近各府衛地方應否再設兵將以備應援
逐一詳議妥確通詳以憑施行毋違

行荆南道調施州兵

爲督撫地方事照得播酋狂逞爲患三省所據湖廣偏橋一帶切鄰播界亟應設兵劄守以備緩急查得前總督部院邢曾行該道於施州各土司挑選土兵聽用今照播防孔棘應合揀調爲此牌仰荆南道官吏卽便行令住鎮施州同知及守備官范光遠新舊掌衛印官指揮周經唐一麒各照二十三年定擬各土司兵數再查卽今某土司兵甚驍勇比前應增調若干某土司兵力稍次應減若干詳加哀益公同挑選務足一萬之數應用何人統領速令各土司點整齊備以待調用一面先將兵數冊報并查有何

庫錢糧堪以動支各兵月行二糧及該省用兵糧餉係何則例逐一查議明悉作速通詳以憑施行毋得遲違

計開施州衛各土司兵

施南宣撫司土兵三千名 容美宣撫司土兵二千名
龍潭安撫司土兵五百名 散毛宣撫司土兵一千名
大旺安撫司土兵五百名 忠峒安撫司土兵五百名
忠孝安撫司土兵五百名

行候代總兵沈尙文防守

爲軍務事照得播酋犯綦之後日在積兵製器近日伊子楊朝棟遺書與酋謂貴州集兵已占白牙垵地方酋回要

犯黔地又前此川東擒獲播夷九受審供酋要侵犯貴州
龍泉等處因見川防將兵畢集酋又垂涎貴州勢所必有
該省提調將兵偵探把截責在總兵沈尙文本官員缺雖
有童元鎮填補但未交代目前地方事務原是本官專責
成例具在合行申飭爲此牌仰本官卽便督行防播一帶
將領衛所印補把守大小等官獎率所部軍兵各將通播
隘路萬分加謹晝宵隄備懸購相應之人時勤遠偵聲息
遇有苗兵出沒相機堵截如或遠遯且勿窮追一應練兵
製器掏壕挖塹但係戰守機宜俱要悉心料理仍備詳本
部以憑裁酌本官毋以一蹟自疏致誤軍情重事儻有功

地方本部院自有優錄如或疏虞責難他諉速具遵奉緣由報查毋得遲違

催貴州議兵糧火器等項

爲緊急軍務事照得黔省防播將兵糧餉等項久已牌行該司查議去後又經數次行催未據詳報近查播酋爲謀叵測要犯龍泉等處地方事勢孔亟防禦不容少懈合再查催爲此牌仰貴州布政司官吏查照原行從長計議鄰播地方要見某州縣衛所最爲緊隘原隸何道專管見屯兵馬若干原是何處將官統領應否再添若干某處稍緩用何官兵把截平時如何懸購偵探有警如何發兵應援

精兵不足某處驍勇可以召募若干應用錢糧動支何項脫有不敷如何設法某處土司土兵可以調用若干某處謀勇將官可以徵來任事其糧餉已買若干趁此秋成應再多糴應責何官管理應運何倉收貯務要蚤爲安置毋致臨時缺乏至於軍中利用全在火器火藥等項該司會同都司悉心計議應造若干上緊動支官銀委官星夜買料製造不得遲延有誤軍機大事但係戰守機宜俱當謀始成終與夫一應未盡事理各司道別有奇謀良畫一併開款詳報此係緊急軍務屢催未報事件勿得再遲未便

爲永甯杜塞禍源

爲緊急夷情事據總兵萬鰲呈據永甯參將吳文傑呈報
七月十五日播兵屯劄永甯地方後溪事勢緊急請乞將
兵應援等因到部院爲照永甯土官素忠於國乃播酋猖
狂螫毒鄰司第查土婦奢世統與世續舊有夙恨世統已
受贍金退住水西見在疆臣處依牧誠恐世統乘機買求
疆臣部落潛來助播劫殺應合戒諭爲此牌仰安疆臣卽
便恪守三尺毋得陰助播兵自干法紀仍譯諭奢世統遵
奉斷案安分住牧毋得妄意縱兵劫殺地方自取滅亡本
官仍禁戢部兵不許聽伊誘惑誤入叛黨均爲不便

貴安疆臣防守

爲督撫地方事照得播酋背負皇恩披猖殊甚旣戕黔省官兵又攻川中縣治近又聲言要侵犯貴州龍泉等處地方大逆無道凡爲臣子孰不痛憤查得貴州宣慰安疆臣與伊母鳳氏屢效忠勤且天朝流錫爵土豐厚至極今值逆酋犯順正其效忠宣力之時况川省酉陽石砭永甯天全平茶邑梅等土司各已發兵數千防守信地貴州一方責任全在本官以爲藩屏亟應整搦土兵加謹防禦乃見輸誠爲此牌仰本官卽便督率所部官舍目把土兵將貴州鄰播一帶地方實心實力加意宵晝防守毋容播州一苗入犯有犯卽擒斬解送該省院道轉報本部院定將有

功目兵照格給賞本官從厚優異如聽播酋惑亂狡計坐視殃民儻有損失卽係縱寇從前忠順付之烏有國法森嚴豈能假借速具遵奉結由報查施行

緝拏奸細

爲督撫地方事照得播酋陷城殺將罪惡多端近見官兵防禦仍有奸細透漏聲息蓋緣內地官民利酋金錢締交心腹在先日隨其往來有司莫知究詰近日雖行禁戢仍在私通書信或用目把裝扮漢人出外在於各衙門體探消息或買別土司下目把土民或作投兵投文隨其出入無禁諸如此類不可枚舉此皆播酋詭謀官司亟宜捕緝

爲此牌仰按察司官吏卽便移文守巡兵備等道通行有司衙所印捕等官密查前項奸細或內地軍民交通書信或別土司上人代伊打探或充入募兵之內俱要的確查訪如果有據拏送該道府審明呈報有功官員另行優敘如或故縱另於別衙門發覺定行挨拏究治決不輕貸

行貴州思仁守巡隄防

爲督撫地方事本年八月初四日據分守思仁道呈據永靖把總呈報播酋同子楊朝棟於六月初旬統兵三路出綦江等處二十八日僞巡警七人各殺牛剝論設關造圍修路待酋四川同兵要犯偏橋思石府衛將軍民盡同上

國龍泉永靖指揮虜同生死各巡警自知罪難容誅大家
驚亂立意殺虜以作墊背等情又據守備楊惟中呈報播
酋四處劄營將黃沙坎等處通衢挖斷小路閉塞夷目袁
守剛點兵往馬頭山各備飯米要往眞州婺川等處夷目
趙士登統兵至穴塘坎要來拏人包哨等因到道呈報本
部院看得該邊防守應用將兵糧草與夫偵探把隘製器
設險等項牌行司道查議又經行催不啻再三迄今未報
殊爲可慮今據呈報前因查得該酋在川曾聲言要犯龍
泉等處該道偵報亦有此息酋雖詭譎此言未必盡虛該
邊隄防將兵最宜加謹守禦除行總兵官沈尙文防禦外

爲此牌仰思仁守巡道官吏卽便嚴行都司管思石守備
事楊惟中永靖把總指揮胡效忠及該邊防守大小等官
各督率所部軍兵將鄰播一帶地方無分晝宵萬分把截
一應掏塚挖塹據險把隘積木累石等項但可以扞禦播
苗衝突俱要悉心料理仍懸購相應之人遠偵聲息儻遇
苗兵出沒務要相機堵遏該道仍查照原行將所轄近播
緩急地方某處應用防兵若干此時見在軍兵若干應再
調募某處某兵若干用何謀勇將官統領火器火藥應製
若干一一計議調停上緊詳報以憑施行此係緊急軍機
如或遲違責有攸歸

查送楊可棟屍棺

爲督撫地方事據巡上東道呈抄播酋楊應龍申該道公文內稱七月初七日蒙差官傳諭施天地好生之德優禮腆儀給賞次男棺柩回鄉收葬又蒙發奸奴何邦卿係已死之屍于春一名原係爲從等情到部院查得何邦卿原在府監追贓未完人犯并未具報病故乃突然送屍恐有隱情于春併送是何原委而腆儀之說未審虛實又聞何邦卿原係縊死不知何故事干國體通應行查爲此脾仰按察司官吏卽查何邦卿因何縊死何故送與播酋于春一名與楊可棟屍棺何故一同送入所稱優禮腆儀是何

儀物何人備辦逐一秉公查明據實叅呈詳報以憑施行毋遲

行貴州布政司趁時糴米

爲軍務事照得播酋近雖稍靜但我心無厭爲謀叵測前又曾聲言要犯貴州龍泉等處在我防禦自宜周密今地方設防分布將兵漸有次第惟本色糧餉一節乃目前急用之需節行貴州布政司預計買備及令製造器械火藥等項去後未見回報曾否酌行今據該司揭稱庫貯堪動軍興銀兩數目不止萬計與雲南應還川省解黔銀兩俱堪動支應糴糧米亟應乘時收買又查該省往規上納事

例等項儻中間如係折色或照川中近例可以暫改本色者亦應亟行庶得濟用爲此牌仰布政司官吏查照先今牌內事理卽將庫貯見存銀并雲南解還內應動若干趁今時熟通詳速委官員照依時估多買米穀製造如法收貯近便倉廩如事例等銀應否隨宜改徵本色俱聽酌處施行其應製軍火器具速照原行製造仍將買過米穀製過軍器改納本色等項緣由先行查報毋得遲緩未便

行貴州沈總兵及思仁道防禦石阡

爲軍務事本年八月十三日據貴州布政司帶管分守思仁道應左布政使呈據石阡府申報七月初八日據龍泉

再示諭爲此示仰奉調漢土兵知悉自後如遇途次經行止宿及分布住守處所敢有故違後開軍令許被害人把連所在官司就便擒解本部院以軍法從事其各處居民亦不許乘此勒指不容求爨借宿違者併究不貸

一凡兵經行離亂部伍擅取民間一木一菜一芻一雞者斬

一求爨借宿或分布處所輒取軍民財物姦淫婦女及燒人房屋者斬

一搶奪擄掠但傷人者斬

一強買貨物恃眾誼譁生事騷擾及與軍民相爭者俱細

打一百

行巡東南二道放糧規則

爲督撫地方事照得東南二道漢土軍兵鱗集數至幾萬每月支給銀兩數亦萬計近據藩司詳稱往歲大征集兵處所支給糧餉俱聽監軍督餉二道覈放通候事完方併銷算彼時征剿番猺兵糧畢集不過數月竣事之計今見在防禦官兵分布四散所需歲月旣難底止而其中收除豈盡無虛在各該道覈放諒有成算在本部院查考漫無可憑相應查議畫一不惟逐處官軍一覽在目抑且日後銷算著有確實爲此牌仰該道官吏卽將防播漢土軍兵

坪長官司報稱本月初二三四日連據各哨把總報稱播
苗破劫石籬門又於馬頭山點兵數日但言伺候楊應龍
令箭至日每兵草鞋一雙飯米二升不知何幹看係地方
事情合行申報等因看得石阡孤城切近播境萬一逆酋
衝突無將無兵何以防禦合行飛報緊急乞賜遣將隄防
等因報道具呈本部院據此除移咨撫院及牌行該總兵官
分布官兵隄防外看得播苗兵形詭詐東出西沒殊不可
測督兵隄防最宜加謹第查石阡係近播地方未見設有
官兵應合再行爲此牌仰本該道官吏官卽便行查石阡一帶
要路會否安置官兵如原未分布卽速調取勁兵委官統

領把截其龍泉等處但是鄰播地方務要不時申飭所在將官整理部兵器具時刻隄備毋得因循此是本官專責脫或疏虞責有攸歸

禁兵騷擾

爲督撫地方事照得調集東南二道防播漢土軍兵往來經過地方或分布住劄處所統領鈐束自有官目徵調之時本部院曾將軍令開款申明豈知復有違玩不遵紀律者如近日劄守重慶陝兵張思興等二人止因打搶人財卽照軍法就彼斬首脇從數人俱各細打已爲明鑒目今仍有軍兵經過州縣或分布住劄去處誠恐復蹈故轍合

每月應支本折銀米置立循環文簿二本開列管收除在
四大總數中有新收者撒下要見某月日調到某處軍兵
若干於何日到伍收糧起若將官召收奉何衙門准允會
否委官點過次列開除如有逃故亦要見糧於何日截支
次列實在仍逐處撒開分別見在某處防守若干俱不必
花名其支放每月不得過初四五日其簿二本一樣每月
倒換一次以憑查驗毋得遲違未便

行三省禁硝黃鹽斤入播

爲督撫地方事照得販賣硝黃入夷與越境興販鹽斤俱
有明禁近查得有等奸商利楊酋金錢於鄰播一帶地方

將前項犯禁之物違法賣與徒知罔利恬不畏法其間情弊更未易數或就中通報內地聲息或假此挾帶諸夷出入貽患地方殊可痛恨合行嚴禁爲此牌仰三省邊播守巡道官吏卽便嚴行鄰播州縣衛所印巡及將領把守關堡等官嚴禁軍民人等不許擅將硝黃鹽斤賣與播夷引惹邊釁如有違禁仍前販賣許巡緝員役官兵據實擒拏到官審確依軍令斬首有功之人賞銀十兩係官員仍行優敘若播人遠赴收買或託鄰封土司代買僻地交送俱要嚴行禁戢追奪一體從重究治施行毋違

發將兵守南川

爲緊急夷情事據守東道報稱據南川縣申報偵得婁國等點苗兵三千有餘俱備紅色腦包絮被槍刀弩鉞等物要來侵害南川等情到道呈報本部院爲照播酋攻陷綦江之後南川江津人民望風逃竄業已不次牌行道鎮分布將兵前去二處防守隨據萬總兵議將梅遊擊帶行鎮遠營五百名東開萬雲奉建等縣鄉兵共三千一百名邑梅平茶各一千名俱守南川續又具報要將前兵住守重慶仍以酉陽土兵六千發守南川今照酉陽續報八月十一日起行土兵四千有零將到重慶該司土官冉御龍素稱忠勇有志報效應合起發防守爲此牌仰守巡上東道

官吏卽行遊擊梅鼎臣將酉陽續到土兵四千餘名責令
宣撫冉御龍選差的當目把統領前往南川防守應用軍
器火藥隨便帶行本官務殫心盡瘁時勤偵探倘有播賊
出沒相機堵截毋得輕躁深入亦不許疏虞誤事文到卽
便起程勿得遲留有負委用未便其冉御龍原領兵二千
仍令本官統領防守府城如本官自願督兵一同防守南
川者亦從其便或前兵不足應再摘發續到別兵併力固
守該鎮道便宜施行具起行到縣日期飛報查考

責成永甯自衛

爲督撫地方事照得播酋背負皇恩自取誅夷凡懷忠奮

勇者孰不痛恨查得土官奢世續母媳屢效忠勤且天朝
流錫爵土豐肥至極今值逆酋犯順正其效勤宣力之時
况水西安疆臣節報自願備集兵糧肩承保土安民修器
設塹隨處擔認今永甯一方責任全在奢氏若該司土兵
前調出者係外鄉之兵尙有內鄉無數精兵隨在應合責
成防禦爲此牌仰永甯掌印土官卽便督勵所部勁兵晝
夜防禦如修塹設險積糧練兵之類一一整備至於永甯
衛與相聯一帶地方處處隄防時時偵探如或賊勢衆大
來犯一面馳報以憑再發兵將應援若或故違軍令具在
先具遵奉緣由飛報

查南川江津餉

爲軍務事照得南川近告警息大有可虞雖經屢行鎮道遣發健兵專委遊擊梅鼎臣前去防禦但未審彼中曾否集有糧餉足敷軍兵五千幾時食用及照分守川東道有特司糧糗之任且見在渝城料理亟應行查并酌定運法以免枵腹之慮爲此牌仰守東道官吏卽查南川卽令發去漢土軍兵若干除折色聽巡道照舊規動支委官前去放散外要見該縣曾經貯有糧米若干可足防守軍兵幾時支用如或不足卽今作何轉輸前去就責縣官監守出納務須兵到餉隨并將江津縣見貯在倉糧餉實數卽今

應否併運逐一速查明悉上緊具報以憑施行毋得遲違未便

責成製造軍器

爲軍務事據布政司呈奉本部院批據該司呈議估造防播軍前應用絲甲腦包絮被長柄烏銃三眼火雷等項各該價值銀兩於本司庫貯銀內動支分發成龍保順敘馬夔嘉眉邛雅潼一十二府州分投承造等因具詳部院批行外看得前項軍中器具關係目前急用分行督造委屬相應爲此牌仰該道官吏卽便轉行後開道屬衙門將布政司發到官銀買造坐派器具委官監製務要件件堪用

倘有草率虛冒錢糧臨時不便禦敵經造官役一併重治
仍鐫匠人名以憑稽查各器具俱限一月以裏通完解驗
以便發赴軍中應用毋得遲違未便

計開縣甲每件用花四斤裏面色布三丈三尺四寸裏紙
二十張縣線三兩并匠人工食共銀五錢五釐腦包每頂
用青布三尺七寸白布三尺三寸棉花十二兩毡四塊耳
擔一條縣線五錢青絲線一錢五分價值并裁縫工食一
錢六分三釐

一分造縣甲腦包衙門 俱照該司發來式樣

成都府二千副

龍安府三百副 行巡西道

保甯府一千副

順慶府一千副

行守北道

敘州府一千五百副

馬湖府一百副

行敘瀘道

夔州府一千副

行巡下東道

嘉定州八百副

行守上南道

眉州五百副

行守上南道

潼川州一千副

行守北道

邛州五百副

行巡上南道

雅州三百副

行巡上南道

一造絮被每件用藍布裏面并花共重五斤長五尺五寸
寬五尺價銀三錢四分

一分造絮被衙門

隆昌縣五百件

富順縣五百件

以上行巡下
南道

榮昌縣五百件

行巡上東道

一長柄鳥銃一千五百桿每桿價銀七錢發敘州府督同
守備劉天俸率家丁製造

行敘瀘道

又劉天俸前次領價同該府打造三眼銃一千桿每桿價
銀四錢零八釐火雷一萬箇每箇價銀一錢姑先造一千
箇聽該道府一併督催完報

併行敘瀘道

申嚴東南四道隄備

爲緊急地方事本年九月初二日據貴州思石兵巡道呈
思石守備楊惟中報稱酋於地名高崖都上壩修建營房
二百餘間聚剽多兵楊應龍調取各巡警赴州宰殺牛馬
豬羊將綦江掣來五司七姓本頭梟示畝血同盟聲言要

攻龍泉思石一帶地方勢甚危急又報於八月初一日祭旗初三日發兵又報酋差三十六所巡警家丁上州又招九股生苗共兵十萬楊酋親統黃平一路往龍泉思南又稱龍泉司治原係播州故土必要占奪又據石阡府報拏獲播州細作馬良貴審稱頭目趙仕登差來看船比伊領兵隨後到江楊酋分差伊親田相公領兵三萬欲攻思南趙仕登領二萬欲攻龍泉楊朝棟領二萬出袁家渡攻葛彰石阡楊應龍領三萬出烏江亦往思石會合有良貴乘楊奎等便船過江探聽適遇彭希舜拏獲等因轉報到本部院據此看得播酋叛逆自知天網難逃迺又親統多苗

欲攻黔省各處兇心愈熾詭計愈深倏云要犯黃平思石
倏云屯劄貓兒岡詐出詐入變幻不可方物今川

東一帶

雖稱隨處分布將來蜂擁並至皆不可知水陸國防之策

亟宜究心隄禦合再叮囑申嚴爲此除行總兵萬鰲外案

仰

布政司
各守巡道

官吏卽將轄屬地方會同總兵官多方計議

倘酋狂肆如昔蟻聚而至水陸作何堵遏何處安置伏兵
設以火器如何夾攻何處應屯一枝明布排柵列成營伍
如何扼險到處偵探到處隄備目前酋得屢旨必加狂圖
急宜詳慎以期鞏固限文到四日內備將設備過事宜逐
款詳報以憑施行毋違

行督餉道往重慶理餉

爲軍務事先據布政司呈奉本部院批據督餉道呈議軍餉各款由詳已行該司覆議通詳到部院除允行外爲照防守將兵業已畢集今南川涪彭江津等處見在渝城分兵前去所需日食糧餉勢必該道親理爲此牌仰該道官吏即便親詣重慶將買運糧餉上緊催督照依原擬如兵行南川餉亦發隨但須以兵臨食足不致枵腹仍督同各該文武等官將收囤之處如法整理其糧米且運赴相應地方以待臨時起發一切事宜該道隨宜料理同報務期到處有餉戰守不致缺乏間有應詳者具詳應徑行者徑

行先將起程日期報查毋得遲違

行川東守巡道備兵馬糧草

爲軍務事案查先該本部院牌行分守川北道查議陝兵入境合用行糧馬匹草料事宜詳報批行按察司覆議到本部院又另牌行驛傳道併議前來俱經批行去後爲照浙省兵馬數五六千之上并河南二千目前可到惟應用入境行糧并隨行馬匹草料與將領等官乘用馬匹廩糧等項亟應預備爲此牌仰該道官吏照牌事理將浙兵并河南毛胡蘆等兵自巫山入境至重慶經過一帶驛站合用行糧草料等項照依單開款目以浙兵六千名河南二

千名廣兵三千名各計算逐一斟酌安置停妥上緊詳報以憑施行毋得遲違未便

計開

一浙兵以六千名計算河南兵以二千名廣兵三千名計算并南將應用廩糧行糧馬匹草料等項

一自巫山高唐驛起至重慶府止計若干站每兵每站銀三分內支米一升五合折銀七釐五毫柴三斤折銀七毫共折銀八釐一毫仍該補給銀二分一釐九毫其馬約算幾千匹每匹每站支銀二分內支黃豆二升折銀八釐粟穀一升折銀二釐五毫草一束折銀二釐加煮豆柴一斤

折銀二毫共折銀一分二釐七毫仍該補銀七釐三毫俱於入境之時委官府佐一員某人總理其食米馬料黃豆粟穀分作三次支給其燒柴馬草安置沿途歇宿驛站市鎮人戶聽委官驗兵驗馬支給如願領折色者卽與支給

一總管府佐一員某管五站或六站

一分管知縣或府縣首領三員管米燒柴馬草

一統兵將領及職官自有原來應付符驗廩糧夫馬外查得本省見行則例參遊中火下馬飯各三錢各邊守備中火下馬飯各二錢今統兵參遊都司留守守備體統漸隆下馬飯中火亦當酌議應除行糧銀各照先年征剿議允

規則於境上總委府佐官處計站數若干總支折色封送其經過各驛若令自備飯食似有不便其參遊都司職銜蚤膳中火宿食每次以一錢五分留守守備職銜一錢至把總千百總以下人數太多驛傳不給已有原派行糧不必再備飯食聽其隨便食用以上俱不許再索廩給口糧下程如有違者許總管官指名申報另處其官兵等原來馬匹間有倒損者委官查驗是實給以執照逐站撥馬遞送

一原定協濟馬匹專爲有應付員役而設如原無馬者又無應付例不與外應令總委官刊刻小票用以私記關防

仍於挂號境上查點給發一人支給一張逐站討撥遞送
各官兵行糧既於境上支給不得重冒驛遞廩糧若無委
官執照印票俱不准恃強混騎馬匹如有違法送統領官
以軍法處治

一安置燒柴馬草以便造飯止宿令各委官逐一查驗各
軍民房屋量其大小先行安置燒柴鍋竈每一家或一十
名或二十名令其造飯歇宿不許逃避仍令各總管官俱
先將各該管驛站處寺觀公館民房預行派定某寺觀容
兵若干公館容兵若干某民房容兵若干俱大書號帖於
門就令各站給散糧米併押運官兵到彼與同統兵官將

各兵儘其寺觀公館照數點入安歇如容止不盡之兵方許點劄民房敢有恃眾逞強不聽查點約束爭入官房民舍占宿并短價強買民間一米一菜淫污婦女擾害居民者或該管查出或被害之人及同伴舉首得實量其事情輕重許管押官公同原來統兵官照依軍法處治各店戶故意刁難抑勒高價及先行逃避者許管押官開名送該管衙門查究招詳該道發落至於渡口預備船隻除有浮橋處所移行該道轉行各州縣作速整理安搭如無浮橋地方卽責之該管官多備船筏每處約用二十隻擺設渡口專在伺候不許遠離每日量給工食銀三分兵盡卽止

若船隻一時難備勘其水勢淺緩可以安搭浮橋者尤爲
委便

一支給升斗將布政司發斛斗行令照式置造一樣幾張
印發各委官支放事完銷算

一陝兵自省城起至重慶止一帶或水或陸會同驛傳道
照原行另議詳報

行按察司兼理監軍事務

爲軍務事查得前接邸報兵部題奉欽依川中添設監軍
道二員料理一應事務除行該司差人守催及將一道先
行守東道來副使帶攝外爲照省會時下應行事宜預

備兵糧修製戎器操練軍馬稽覈包冒兼之陝浙等省調到官兵鱗集甚眾諸凡布置必須再得一道帶管庶有責成在驛傳道應令肩理但該道有六道事務已屬繁冗又帶巡西刑名更多查得按察總司堂務頗簡相應委代爲此牌仰該司官吏卽將監軍道事務暫行帶管聽本部院有行兵糧戎器等事一一料理俟監軍至日徑自交代施行先具接管遵行緣由報查毋得遲違

行巡下南道督永甯兵

爲軍務事據永甯宣撫司報稱播賊劄兵二十七營要來攻劫本撫地方是實等因又據巡下南道報稱播目趙提

調領苗兵住劄羅之渡要出內地又稱見屯苗於花毛田坎路造船製器要與甯土司仇殺本道覆查前報永兵敵殺播夷情形果實等因案查先據該道并將領各報永甯土兵把截播路與賊對壘斬獲首級奪獲器具收回擄去人口且稱落水墜巖不計其數已經批行獎賞及查驗功級詳報另行陞賞去後今據前因看係播賊憤兵思逞志在報復恐該土司戰守不力致有疏虞合行專管督戰爲此牌仰該道官吏即便選差智勇官員前去嚴督該司土官把目精兵人等各牢守隘口如遇播賊入境儘力剿殺有功人員該道稽查明白不時詳報以聽獎賞仍候類

奏陞賞其該土司原撥守納谿土兵一千名并敘南先發
守江津兵內再撥二千及鎮雄等兵速催前赴永甯聽該
道并吳文傑分布併力防禦堵遏用保無虞毋得遲違未
便

宣諭

爲軍務事照得楊應龍殘害播民興兵造反朝廷發天下
兵馬五十萬前來征剿原只誅他一人爲民報讎誠恐播
州之人不知趨避又且爲彼哄誘拒敵官兵以致大兵所
至玉石不分是朝廷救民之仁反成害民之事今將朝廷
德意一一宣諭明白凡播州大小之人各宜尋思趨避禍

福無常惟人所召臨歧不斷後悔何追各宜深思須至諭者

計開

一諭楊應龍你是一箇土司官自你祖宗來爲朝廷臣子二百餘年但凡你家獻木從征有些小功勞朝廷便有大陞大賞何曾虧負了你只爲你滅絕天理傷殘民命潰亂綱常被人奏了朝廷方纔提問你又不出發兵拏你你哄進白石口反殺了官兵二三千這一時已是你反了只爲東西用兵沒工夫征你所以曲赦你罪把你撫了你只道朝廷怕你越發無禮今年飛練殺了貴州官兵萬餘綦江

攻了城池殺了將官殺虜百姓數萬這明明是你造反豈
有再赦之理今朝廷發天下兵馬五十餘萬一總督二巡
撫五總兵六監軍專來剿你你就有翅也飛不去你一箇
土官殺了數十萬人就萬剛凌遲也是不虧只可惜你的
祖宗絕了香火你的妻子斷了根苗你若自知罪大惡極
天地不容或自盡以謝朝廷或單身自縛軍前請罪或將
大頭目及主謀領兵之人多斬縛些獻出任從朝廷處治
那時節就是你已犯了天條一身免不得死你的妻子還
留得在爵土雖難保全墳墓還不發掘你到九泉之下也
還見得你的祖宗你若再不悟可惜你的性命妻子與別

人換了功名富貴我說的是不是你再思之

一諭田氏楊朝棟母子從古說大義滅親蓋世間只有朝廷爲大人若得罪朝廷雖其骨肉至親能除了他也是忠臣孝子所謂亂臣賊子人人得而誅之者也今楊應龍反了朝廷罪在不赦你做他妻子的當上思朝廷法度爲尊下思祖宗香火爲重將他殺了獻出軍前我已有頒行題過賞格免你死罪得奉你祖宗香火這是與朝廷爲忠臣與你祖宗爲孝子豈不流芳於百世不然大軍一至你們與他同死孩芽也不留一箇萬世說你們是賊妻賊子豈不哀哉我說的是不是你試思之

一諭楊瑞龍楊兆龍楊祥龍等並楊氏一族之人你家祖宗與你立下基業是千年不毀的今楊應龍造反致的大兵進剿莫說天兵所至玉石不分就是你內司外司人連年被他殘害恨你一家人入骨那時誰肯留你你們得他甚麼便宜與他同死豈不哀哉你們若及早下手把他殺了或拏住獻出賞格上開得明白就著你們世爲土官常享富貴你們父祖九泉之下也喜歡你們我說的是不是你等試思之

一諭田一鵬田良玉田種玉等你們是楊應龍至親常時與他用事誰人不知今應龍已罪在不赦朝廷大兵進剿

你們一家人都是與他同死有甚好處你們若及早將他謀死或紿縛獻出定照賞格你們就做他的宣慰使就享他的富貴豈不勝似合族之人爲他受死叫人輩輩說是反賊的親戚我說的是不是你等試思之

一論何漢良李旭張玉楊兆麟楊明楊珠孫時泰黃明敬何廷玉馬忠傳一元袁子童陳太何世才等今楊應龍得罪朝廷發兵征勦只是殺他一人以正其罪你們平日雖是爲他謀事領兵原是在他手下出乎不得已今賞格內明許將功贖罪你們若將他殺了獻出首級決然賞格將你們就做宣慰享他的富貴以前就有天大的罪惡也都

赦了今他定然吽你說你們與他同惡相濟旣勦他定不饒你不知首從不同途功罪可相準且說與你們眼前的事今松潘副總兵周國柱原名是筆寫氣當初被劉東陽造反將他用在營中他明知朝廷恩不可負只是一時無奈且跟從他卻暗與官兵相約大兵一進時他在劉東陽身邊將東陽一刀殺了開了城門獻了首級督撫報知朝廷當日加他都指揮使轉遊擊將軍今管副總兵事不日就做總兵見領陝西三邊勁兵三萬來勦應龍何等正大光明真是忠臣義士你們今日殺了應龍只周國柱便是樣子我說的是不是你等試思之

一諭十三姓苗夷仲家苗黑苗犴獠苗木老子姜苗花苗
菜家苗九股苗你們原是貴州銅仁鎮遠等處良民楊應
龍當初招你們來只說叫你們替他當兵與朝廷出力報
效或與各土司讎殺原不曾與你們相約同反朝廷不想
他誑得你們來假以人家地土與你們種著人家妻子與
你們守著初時只哄你們替他做賊後來遂哄你們同他
造反不知朝廷可是好惹的反賊可是該做的今朝廷怒
了發天下兵馬五十萬來剿他你們如何反得過朝廷那
時大兵一至連你們都殺了有甚好處且如官兵替朝廷
殺賊勝了的大陞大賞榮華富貴敗了的墓頂封官子孫

世襲你們替他出力勝了賞甚官爵敗了有甚恩典你們種的土地是人家的白占人田地天也不容你們守的妻女是人家的他到底不與你一心得手時還暗算了你我今指與你們一條明路你們若有本事殺了楊應龍或是他妻子獻了首級就照賞格叫你們做他的宣慰使象他的富貴若殺了他大頭目獻出也得做官你們若無本事殺了他不如急早回家各安生理我有招降官斷不害你返給與盤纏執照永爲良民豈不勝似替反賊當兵子孫也落箇賊名俗語說得好晴乾不肯去只待雨淋頭他家的墳裏鬼哭祖宗也怕了你們如何不同心聞說他與你

們刻血說誓這是哄你們的反了朝廷天地不容鬼神不
祐刻血何用他又必定哄你們說當時攻了碁江是你們
今朝廷斷不饒你不知蛇無頭而不行造反的原是他一
人今朝廷只殺他一人莫被他哄到底做鬼也不伶俐我
說的是不是你苗夷試思之

一諭五十四里八十八局八路十二莊十三親管五司七
姓內司外司頭目提調坐寨人等婁國張讓鹿罕羅剛穆
炤母柱王繼先袁年鄭葵駱朝賓趙仕登朱敬張漢清等
楊應龍節年殘害播州人民一語之錯便至斬首一事之
忤便至傾家也不知殺死多少好人淫污多少婦女先年

奏民許告也是出乎無奈他又不知自反朝廷饒得他他還饒不得百姓把你播州祖代生養良民墳墓搬了灰骨揚了子孫殺了妻女污了地土賞了苗子妻女配與別人死者無葬身之地生者無還家之期何邦卿在重慶監裏還要出來將肉喂狗將頭吃酒撫按奏了朝廷也怒將道府官提問了這都是替你播州百姓做主替你播州百姓祖宗伸冤你播州百姓也是人生父母養的如何無一些人心反替他出力與朝廷做對頭抗拒天兵你們只見他眼前無奈著一兩句好話哄你們說他再不害你不知今番若再饒了他他得了活命依舊和你們算帳舊性兒不

久發了家家還出等賓人人還納絲銀但有違犯照舊殺戮你們的妻子還是苗子的你們的性命還是他的世間豈也豈不過你播州人你們何不將他殺了就得做他的播州宣慰使不然早投出來替朝廷出力報本大小也討得箇官做他如今將你妻子監在養馬城養雞城這是甚麼道理朝廷用人封妻廕子應龍使人質子當妻你們妻子在裏面憑他與手下人姦污有甚清白有甚割捨不得你們幹了好事得了官爵做了良民怕沒妻子朝廷爲你們做主你們自家返做不得主豈不可憐豈不可笑我說的是不是你們試思之

一諭四方流寓播州商民你們先年近日流寓播州或因
經商或因避罪或因傭工或因被掠或因遊學原是良民
豈是從他做賊不想楊應龍日日殺人朝朝弄兵你們受
了多少殘害耽了多少驚恐今日他反了朝廷做了賊了
又拏你們替他充兵上陣贏了時他延旦夕之命輸了時
你們永作他鄉刀頭之鬼你家父母妻子親戚知也不知
又有一等小人攻發出來說你是從反之人從古道得好
一人造反九族皆誅那時有司推勘明白把你九族誅了
你也不知今幸大兵未進你們何不急急走出我自有招
降官定不殺害且給盤纏路引放你回家見了父母妻子

六人親戚哭一場笑一場死也死在你家裏豈不是好再不然你們結黨成羣把他殺了或將他妻子頭目殺了出來獻功定照賞格陞賞你們若殺了他的還做宣慰天大富貴只在眼前爲福爲禍在你自取我說的是不是你們試思之

行湖廣布政司料理兵糧

爲軍務事照得播賊楊應龍大逆不道自取誅夷屢奉明旨合兵進剿案查湖廣地方有偏橋鎮遠清浪平溪等處相連播界節據呈報賊要衝突已經具題備移楚省撫院及徑行司道將揚州鎮江等處及彼中漢土官兵共調集

肆伍萬分布鄰播關隘一面買備半年糧餉隨運適中地方并委官打造衣甲器具籌畫戰守機宜去後又經行催不啻數次若謂錢糧不繼已將部議解蜀銀一十六萬兩有零盡留彼中聽用且該省通屬庫貯銀米亦可正支備辦卽今川貴兩省兵齊糧足不日相機興師楚中絕無音耗萬分可虞合再行催料理庶便一齊舉事爲此除行各該道外牌仰該司官吏卽便查照節次奉有牌案會同按都二司將應調集兵馬如揚州鎮江等兵已經題請者徑呈撫院請發咨文勘合差官前去守催如原調該省所屬土司兵馬已到者一面分布未到者一面嚴催應備木折

糧餉卽本部院前留該省銀兩如果不敷無論司府州縣庫貯堪動正項糧銀卽行支買糧米或解給行坐二糧并應造軍火器具俱一一如數備辦聽候約期行事儻或一事遲違牽滯兩省數萬甲兵脫有疏失誰任其咎仍將調到某處兵馬若干見在何處防守買過糧米若干見運何處收貯并製造盔甲槍刀火藥銃砲各若干實在數目先行具報仍移文各司道將責成監軍督餉催兵事宜一體遵照施行毋得遲緩未便

申飭道鎮防酋

爲軍務事近據守巡川東道報稱楊酋差人出外院道投

文明係探聽內地聲息又據合江遊擊楊敏政報稱播酋
遣牌差委夷目前來仁懷等里要鮮明衣甲軍器戰馬聽
候該酋親臨調用各等因到部院看得該賊連旬以來默
靜以待惟在窺我內地少有一毫懈弛湧驟突出志在不
小卽今該道轄屬地方雖有調到漢土軍兵切慮防守疏
虞合再戒嚴爲此牌仰守巡上東道兵巡下南道敕瀘道總兵萬鰲卽便傳
令川東一帶各該將領及土司領兵官舍目把督率所部
軍兵晝夜加謹隄備仍不時差人偵探該賊情形如遇突
出相機併力堵截如彼詭計誘敵不可窮追務在緩急得
宜進止鄭重固不可容賊狂逞亦不得張皇失事此在該

鎮道不時戒備用保無虞毋得違慢未便

催湖北守道督餉

爲緊急軍務事照得播首叛逆奉旨征討楚屬偏橋等處均應進兵該省約用精兵四萬先該本部院具題移文院司各道一面調取及支官銀買備半年餉米備用去後今照川貴兵集不日相機行事不知楚中糧糈起運若干誠恐遲緩應合再行查催爲此牌仰該道官吏查照先今牌行事理將該省四五萬官兵足用半年糧米會行布政司委官分投運赴兵屯鄰近地方收貯聽候接濟倘不敷用移文該司再動四川留楚餉銀分發便道州縣嚴限買運

該道移駐辰沅一帶督催不得遠憑檄文致誤催償仍分委才能職官晝夜監督其米麴乾糧亦須剋期備辦奉委承理各官如或因循怠事著實懲治間有奉公勤慎趨事先竣該道揭報以憑優處施行此係卽日興師軍機緊急事理毋得再遲未便

行總兵劉綎援合江

爲緊急軍務事本月十八日據兵巡下川南道報稱播賊點兵數萬親統要由高洞赤水直抵合江乞發火器多兵應援等因又據塘報官岳鳳鳴報稱十五日五畝堡千戶吳承祖報稱曹副總兵吳都司差舍人史文富等稱播兵

大約三萬由木廣高洞等處攻打合江等因各報本部院
爲照合江爲川南要緊地全省水路咽喉今播賊統兵謀
犯情形已露雖彼處有兵但寡衆不敵必須應援庶保無
事爲此牌仰本官卽揀有能將官一員帶領勁兵一枝不
拘幾千各攜原有器具多發慣用火器軍兵無分星夜馳
赴合江會同曹希彬吳從周多方設策隄備堅守城池不
可爲賊所誘墮彼奸謀如賊逼臨相機行事至於掏壕挖
塹設險埋伏查照節行再加整備先將發過將兵數目起
程日期具報其重慶江津瀘納永甯等處尤須一體申飭
萬分隄防恐賊聲東擊西少有疏忽責難他諉毋得遲違

未便

給投降長官袁年王繼先

爲督撫地方事據播州土司赤水里長官袁年呈稱先祖
世傳忠孝止因二十二年故父袁子升奉調出兵進播不
意奉撫父升於次年歸華二十五年內被播捉去苦死近
年添設兵將年思本里接壤內地素沐王化父因應調冤
死無辜年能自新恪守紀律豈容槩累已申合江及楊遊
擊處立約自後播州聲息年卽抄報今本里遭毒倒懸莫
解居民驚惶如坐湯火每欲督眾投奔有司保全殘喘恐
爲縣棍阻害赴愬無門伏望招順賜牌照身仰年操練該

下土兵在彼造冊呈報聽令遵行等因又據仁懷里長官王繼先呈稱連年被播讎懷將親袁子升擒拏非命播惡自犯天討誠恐一槩難辯乞賜給文付下操練聽候大兵至日出力報效等情各具訴到部院案查節據巡下南道并遊擊楊敏政各申呈夷目袁年王繼先二人率領所部土人妻小乞要投順安插等因前來俱經批行審詢來歷果否出自真誠一面密行查訪去後未報今據各目差人具訴乞要賜牌照身一節相應俯從爲此牌仰本目卽便在彼操練兵士造冊送報聽令征進若二目能令夷目土人擒斬立功事理密圖應龍父子首級來獻定照欽依陞

賞事例世爲播州宣慰仍賞銀一萬兩如違二司自取誅戮該目先將播地險要一切機宜密報本部院以憑施行

行守巡荆南道調施南兵

爲緊急軍務事照得施南容美等土兵已經牌行該道轉行荊州府支給行糧起發赴楚偏橋分布去後近查各該土司相距偏橋道路遙遠不便馳赴相應改徵入川爲此牌仰該道官吏卽將原調施南容美散毛等七土司行令各該土官查照前牌兵數各挑選齊備責令就便入川徑赴涪州聽候分布其行糧照依川中各土兵事例每名日支銀一分五釐以本地起至涪州止計算已行夔州府照

日動支差官徑解各該土司如銀到彼該道差官一二員前來會同蜀省差官前去面交各土司土官收領放散至於安家一項原無開載明白曉諭遵守文到該道卽令各兵兼程前赴涪州不許遲延其偏橋兵馬聽該道通詳屢次所行事理於附近土司上緊調發施行毋得遲違

行總兵劉綎隄備重慶江津

爲緊急軍務事照得播賊聲言要犯合江屢經牌行本官應援去後彼中隄備固宜萬分加謹但逆賊爲謀甚狡恐係聲東擊西之計或撤我官兵相向合江而自出重慶江津之間與本官決戰亦未可知所有重慶江津一帶尤須

查照節行萬分隄備爲此牌仰本官卽將重慶江津南川等處各信地萬分加謹防守一面熟思奇正相機處置如遇賊來多方設策併力戰拒務使渠魁授首片甲不還仍須處處偵採用保萬全先將戰守機宜密報部院以憑施行毋得遲違未便

計處軍餉

爲軍務事照得征播官兵本色糧餉節經本部院督行布政司議詳一起支銀三萬兩發西南北買米六萬石分解東南一起又支三萬兩發巡上東買穀十二萬石二起議將重慶所屬州縣秋糧改徵大米一十三萬四千八百七

石五斗一起支西南濱江州縣倉穀二萬石一起支川東道屬州縣倉穀五萬二千九百有零解該府一起支銀一萬兩買米二萬石貯省各備支以上共計該米三十一萬石有零然當時以兵六七萬名計之足半年之食該備餉米一十萬八千今漸次添餉亦漸次添兵自七月以來東南亢食暨本省外省兵馬約有十萬卽目兵齊進攻兩地多歧分運恐將來不敷支用臨時難免庚癸之呼應合再行計議爲此牌仰四川布政司官吏會同監軍督餉道從長查議見在東南本色糧餉實有若干可支官兵若干幾時支用倘或將來難繼應再買備若干務須有餘毋使不足如

應買運酌定數目上緊呈詳請發官銀責成相應州縣糴買伺候以待起運再照綦江卽日應發將兵前去分布戰守合用糧餉亟應籌畫酌定如何起運應用何處人夫作何轉運沿途用何官兵防護到縣用何職官監收至於永甯一路亦進兵所必經者涪州武隆彭水等處目下調取施州衛土兵防守糧餉及轉運事宜均宜預計一面料理一面另詳呈報以憑施行毋得遲違

申飭道鎮加謹防禦

爲緊急軍務事本月初二日據

總兵劉綎本官

塘報防禦南川

遊擊王之翰差人偵探播賊有眞州民張廷瑞墨帖飛報

楊應龍統兵出關數多不知何往又據縣民楊巨賓楊坤探得楊酋點兵三萬令各備乾糧七日竹簽三根又據兵快吳正東楊傑報稱楊酋委於十九日發兵數萬備乾糧七日又在土坪甯溪取牛五十隻賞軍又差頭目帶人五十在黃桑壩起軍有眞州百姓攜男帶女搬出南川各處去訖除職發石砭司兵五千前去南川協守合行飛報等因到本部院爲照播賊連旬以來不露情形詭謀端在不小據報點兵數萬各備乾糧竹簽一節度賊惡狀勢必東犯南川衝突武涪一帶南出合江蹂躪敘瀘之間抑或知我大帥已至率苗儘力向渝決戰皆未可知今南合兩處

爲全省門戶喫緊要地均應多方隄備合再申嚴爲此牌

仰該道官吏即將該屬東南一帶但鄰播處所比常萬分

隄備嚴責各該官兵晝夜遠偵一遇警報卽催總兵官星
馳督兵前去相機應援仍令隨處官兵毋容時刻懈弛各
不離甲冑枕戈以禦不許遠離城廓輕與交敵暫且固守
城池以保萬全至於南川合江江津尤須多發勁兵多揀
慣使火器人役前去毋得違誤責有攸歸若有緩急情形
不時馬上飛報

柄牌傳諭陝兵不許沿途騷擾

爲軍務事照得陝西甘肅延綏各鎮官兵奉命入川征播

各兵行止宿食自有將官千把總統領應當遵照本部院
節行軍令沿途秋毫無犯近據漢中府申稱固原征播兵
馬已過將官千把總家丁人等或遷延數日索取折乾或
網打召募橫騙無忌或沿途宿娼縱兵搶奪各驛官民驚
畏馬夫皆爲逃散除批行按察司嚴究正法外誠恐後到
官兵仍前恣肆不無均罹法網合再禁諭爲此牌仰陝西
甘肅延綏各鎮領兵等官查照本部院節行牌令事理將
所部兵馬嚴加約束若再如前縱兵騷擾搶奪財食綁打
夫牌等項事情查訪得實先將該管官員無論大小俱照
軍令從事爲惡軍兵重則梟首輕則割耳網打決不食言

再行傳諭毋得故違特示

操演官兵

爲軍務事照得近日調到本省外省漢土官兵鱗集於東南兩路爲數甚多雖各有所長馬步戰法帶有隨身平昔慣使技藝但未知操練何似卽今興師計在目前合行演熟爲此牌仰

巡下東道
巡下南道

監軍道
本官

官吏卽便行令統兵將官

土官各將原領所部兵馬移文總兵官聽本官逐日預將交戰陣法時刻操演進止機宜緩急戰勢逐一教習務俾將領與千百把總隊長盡熟部兵形面武藝軍兵皆知本管號令至於馳騁馬戰打放火器尤須勤練訓講奇法俟

本部院卽日臨_渝彼閱試分別勤惰以憑勸懲施行毋得遲
違未便

再委文職押兵

爲軍務事照得

_{重慶敘瀘}

等處漢土官兵雲集統率雖有將領

千百把總等官自宜恪遵軍令無敢違犯業經於成都各

衛揀選指揮千百戶等官各將土司土兵令之每員監管

千名或五六百名聽各分布去後應再選委文職一員監

押庶紀律嚴明號令一新爲此牌仰

_{兵巡下南監軍巡上}

東道官

吏卽將重慶涪州敘府瀘州江津南川彭武合江納谿永

甯等處漢土軍兵每處再行選委文職一員先將職名呈

報以憑批行責令會同原領將官土官監押嚴禁各遵紀律安靜守法每日專聽將官操練戰陣聽候調遣施行毋得故縱遊蕩生事害人責有所歸

行湖貴操演官兵

爲緊急軍務事照得

黔楚

省征播官兵據報業已調集但須

操練精熟庶可期於萬全卽目約會興師事在萬分緊急

所據兵馬戰法合行申飭教演爲此牌仰

湖廣貴州

監軍將領

等官各將調到兵馬每日弔赴操場教演奇正戰法必使耳目習熟旗鼓馬步習熟進止仍各盡所長或用槍刀弩矢或用棍棒格馬或偷營劫寨或打放某項火器逐一多

方教習分別巧拙酌加獎賞用示鼓舞如領兵等官視常怠忽卽按軍法從事此係軍機所關目下舉事幸毋遲緩

調永順保靖兵

爲軍務事照得播賊楊應龍負國厚恩雄據絕地統兵犯順流毒三藩本部院奉命專征罪在罔赦除甘肅薊遼延綏固原天津朝鮮諸鎮雲南廣浙山陝井川貴等省漢土官兵家丁三十餘萬俱已徵調到渝分布外查得永順宣慰司宣慰彭元錦保靖宣慰司宣慰彭養正忠勤素著部下目把士兵勇敢直前相應揀調用備前鋒爲此除發令旗差官前來外牌仰分守湖北道官吏照牌事理卽刻選

委謀勇將官二員分投前去永順保靖二司著落宣慰彭元錦彭養正各將部下土兵逐一挑選彭元錦下七千名彭養正下五千名共一萬二千名俱要年力精壯武藝高強各備鮮明衣甲鋒利器械責令委官督同土官親自管押沿途務要安靜秋毫無犯如有故違卽按軍法定限月終馳至偏橋劄營聽候總兵官陳璘到彼分布戰守仍諭令二官竭忠報國建立奇勳有功之日本部院定照題准事例特與敘薦褒加隆恩斷不爽信就中如有老弱不堪者卽行汰去毋容混冒充數致費糧餉其各兵行糧照依彼中事例聽該道卽於道屬府州縣堪動銀內一面酌量

支給一面具由通詳該省兩院施行此係萬分緊急事理
毋得因循誤事責有所歸先具選調兵數起程日期飛報
查考

再催湖廣布政司備餉製器

爲緊急軍務事近准湖廣撫院咨據該司呈本省偏橋等
處征播官兵三四萬已備糧餉三萬石解運聽支等因咨
報到部院查得該省備餉三萬石不足前兵兩月之食已
經牌行該司查照本部院履行事理備足半年餉米并議
湖北一帶州縣將應徵大糧照川中事體改徵本色及查
倉穀碾米運赴軍前聽支去後第恐該司仍前遲緩不無

有誤事機卽日川貴大舉楚中信地無兵無餉深屬可虞
合再差人守催爲此牌仰該司官吏查照先今牌行將四
萬兵馬足支半年糧米除見有三萬石移行督餉道一面
起運外其餘不敷之數或動支庫銀或將湖北有司大糧
改徵本色或碾各倉稻穀與折色銀兩俱要剋期運貯相
應地方收貯聽候支給其軍火器具查照前移撫院轉發
單開數目已造者上緊起發未造者日夜製造目下三省
協力進攻一有違誤責難他諉速將完解過本折糧餉軍
器等項數目具由呈報以憑施行毋遲

獎勵安疆臣

爲軍務事照得貴州宣慰使司宣慰安疆臣心存報國志在安邊憤鄰孽之駕禍則歷陳始末辯白最明防叛逆之披猖則捐糧置器隄備甚密滅賊之心大槩已見勤王之念不問可徵卓有父風肅將母命忠臣孝子孰有過焉卽今大舉在邇相應先行獎勵以示激勸爲此牌仰貴州布政司官吏卽便動支官銀打造銀牌一面重十兩銀花二枝重三兩再買紅綠段四匹會同守巡貴甯二道差官用張鼓樂導送宣慰安疆臣收領以示本部院旌獎之意外動銀一百兩犒賞領兵目把人等仍諭令本官承獎之後竭忠盡節整擷兵馬凡鄰播一帶信地目前尤加防備如

遇播賊出沒乘虛進擣有功之日定照兵部并本部院題
准事例特與奏請隆恩效勞獲功目把一體照格優敘陞
賞決不爽信具獎勵過緣由報查

申嚴保甲密查奸細

爲督撫地方事照得保甲之法專爲弭盜安民譏察漢夷
奸細若印捕等官極力奉行卽古人寓兵於農其爲保障
深屬有裨先該本部院入鎮之初業已通行去後今隨事
考成各有司勤謹奉行者固有怠忽沈閣者亦多卽今播
賊猖亂官兵大舉奸細出沒猶然如故所有原行保甲及
禁戢事宜合再申嚴爲此牌仰該道官吏通行所屬府州

縣衛所各將境內原編保甲查照舊規逐一修舉責令城市鄉村黨甲正副督率各甲人戶整齊原有旗鑼銃砲槍刀弓矢鈚頭木棒等項器具各要鋒利倘有舊朽不堪禦賊速令更換仍以每十戶爲一甲置一大牌開列甲下人戶輪流直宿巡守如遇賊出卽鳴金放砲各家一齊救援其近播去處若有防守官兵仍同併力追殺獲有苗夷功級無論官兵鄉兵一體從優給賞如有偷安呈報所司嚴行究治仍責巡直官兵黨甲密查漢土軍民人等間有不務生理潛入播夷傳報消息或播人出外窺探兵馬情形及漢民圖利窩藏通同爲奸貽患內地許各甲人戶互相

舉首拏送該管衙門查實具由轉解該道嚴行訊審招詳
報奪如巡直員役因循避怨不行盤詰及各甲不行首正
事發一體連坐仍以奉行動情定有司賢否該道宜著實
申明務期奸細斂足盜賊潛消脫有虛應均屬未便各具
遵奉緣由報查毋違

平播全書卷八終